

Նրա աչքը ընկաւ իրեղէնների վրայ, որ գնել էր վաճառականներից, վեր առեց մի կողմը նետեց, ասելով.

– Տարեք այդ դրամները մի տեղում կորցրեք:

– Ինչո՞ւ:

– Բոլորը կեղծ է:

– Եւ դու չճանաչեցի՞ր սկզբում:

– Ճանաչեցի, բայց դարձեալ գնեցի: Ես դիտմամբ ընտրեցի կեղծերը:

– Դու թոյլ տոնեցիր, որ խաբէ՞ն քեզ:

– Այո, ես թոյլ տոնեցի, որ խաբեն ինձ:

– Ինչո՞ւ, այդ ի՞նչ խելք է:

– Որ նրանք կարծեն, թէ ես հետաքրքրուում եմ միայն հնուփիւններով, որ նրանք կարծեն, թէ ես միամիտ եւրոպացի եմ, թէեւ վատ հնագետ եմ:

– Ի՞նչ երկիւղ ունէիր նրանցից:

– Եթէ հասկանային, որ ես հայ եմ, իսկոյն կը գնային եւ, որտեղ յարկն է, կը մատնէին ինձ:

– Նրանք խոստացան նոր իրեղէններ եւս բերել, եւ դու կրկին պիտի ընդունէ՞ս նրանց:

– Կ'ընդունեմ եւ դարձեալ կը գնեմ:

Ես զարմանում էի, նա որտեղի՞ց այդքան փող ուներ:

Նա իր ոսկիները այնպիսի առատաձեռնութեամբ էր շարտում, որպէս սոխի կեղեւներ:

Է. ՀՈԳԵՒՈՐ ԱՌԱՋՆՈՐԴԸ

Մենք պատրաստուեցանք գնալ հայոց առաջնորդի մօտ:

– Սրբազանի մօտ դատարկաձեռն չի կարելի գնալ, – ասաց Ասլանը իր արկղներից մէկը բաց անելով, – նրան պէտք է մի որեւիցէ ընծայ տանել:

Նա դուրս բերեց քթախոտի մի գեղեցիկ տուփ, ասելով.

– Արեւելքում պաշտօնական անձինք ընծաներ շատ են սիրում...

– Բայց դու փաշային առանց ընծայի ներկայացար:

– Դրա փոխարեն ես բժշկում եմ նրա որդուն: